

Sustegn a la pressa è sustegn a la cultura rumantscha

Il politicher surmiran pleda per ina gasetta quotidiana e gasettas regionalas

CUN STEFAN ENGLER HA DISCURRI
CLAUDIA CADRUVI / ANR

■ **La Rumantschia duai demussar solidaritad per cuntinuar cun la pressa surregionala quotidiana e per mantegnair la pressa locala ch'avra la fenestra en la regiun. Stefan Engler averteschada dad in regress irreversibel sche la gasetta surregionala cumpara be pli trais giadas l'emna. Il cusseglier dals chantuns è pront da sa metter en ils stadals per batter en il parlament. Tenor el dispona la pressa rumantscha mumentan da memia paucs daners per avair ina perspectiva. I saja da procurar che la pressa haja almain puspè ina perspectiva per ils proxims diesch onns.**

Sche nus perdain la gasetta va puspè in toc Rumantschia a perder

Tge gasettas rumantschas legis Vos?

Stefan Engler: Sez sun jau abudent da «La Pagina da Surmeir» e da La Quotidiana. «La Pagina da Surmeir» sco gasetta emnila avra a mai la fenestra en mia patria. Cun quai ch'ella n'ha er betg la pretensiun dad esser actuala chatt jau en ella in stgazi d'istorgias or da las vischnancas, or da la societad, or da l'economia e da la politica. Quai stim jau fitg.

Tge legis Vos en La Quotidiana?

La Quotidiana ma porscha la survista sur da l'entira Rumantschia. Tge sa passa en l'Engiadina Bassa u si Tujetsch? Sco politicher hai jau interess per l'entir Grischun ed en La Quotidiana survegn jau in bun eco. Pertutgant las actuali-



Legia tant La Quotidiana sco era «La Pagina da Surmeir» – sco politicher vul Stefan Engler esser infurmà da sia regiun e da l'entir ittschess rumantsch.

tads si da Berna: Las autras redacziuns da gasetta grischunas han strusch pli schurnalists en il parlament, pigliond or La Quotidiana cun la ANR che tematisescha er aspects grischuns che vegnan discutads. Gliez è ina plivalita.

Tge valur ha ina gasetta per il linguatg?

Igl è indispensabel da disponer dad ina gasetta ch'ins po tegnair en maun e che vegn mintga di. Da reducir la gasetta da tshintg sin trais dis, gliez giess adina en la medema direcziun, gliez na pudess ins mai pli curreger. Jau crai era ch'ins sto dar a las gasettas rumantschas ils

meds per pudair porscher ina buna qualitad. Schurnalistem custa. Quai vala era per la Rumantschia.

Mumentan emprovan ins da chattar ina soluziun per l'avegnir da «La Pagina da Surmeir». Tge fiss Voss giavisch?

Il giavisch è da savair mantegnair questa fenestra regionala. Ils Rumantschs en l'intschess dal Surmeir s'interesseschon per quai che curra e passa en il conturn. Quest fenomen enconuschan ins gea era tar las gasettas regionalas tudestgas. Ils lecturs èn interessads da savair tge

I na basta betg da dar 50 000 francs e crair da salvar uschia la pressa

che marscha en il conturn. Da l'autra vart dovri er ina solidaritad en l'entira Rumantschia. Quella solidaritad sto empermetter ina gasetta dal di sco er ina gasetta regionala emnila. A mai mancass «La Pagina» sch'ella na fiss betg pli.

Vus giavischais ina gasetta stampada?

Gea. Jau crai, sche la gasetta giess a perder, lura giess puspè a perder in toc Rumantschia. Da preschent discuteschan ins gea era davart ina collavuraziun pli ferma cun RTR. Jau na sai betg tge ch'è il stan actual en questa discussiun e sch'i va per lavur redacziunala, organisatorica u finanziaria. Ma en general poss jau m'imaginar ch'ina collavuraziun pli stretga – era da las redacziuns regionalas tant da radio sco gasettas – sa angal esser ina plivalita.

Sco minoritad meritain nus in tractament spezial

Essas Vos pront da s'engaschar sco cusseglier dals chantuns per ina buna soluziun per la pressa?

En mintga cas. Tenor mai ha quai ina gronda muntada. Sustegnair la pressa vul dir sustegnair la cultura rumantscha. Quella tutga tar nossa identitad. Nus avain en quel regard er autras kundiziuns che las linguas grondas sco il tudestg. Sco minoritad meritain nus in tractament spezial.

La lescha da linguas preveda gea la promoziun da la pressa rumantscha.

Ins na po betg sa lubir da perder ina pitga uschè impurtanta en il Grischun. Ins sto esser pront da far insatge. I na basta betg da dar mo 50 000 francs e crair da pudair salvar la pressa rumantscha. Ils daners che stattan da preschent a disposiziun èn memia bler per murir e memia pauc per avair ina buna perspectiva. I vegn fatg bler politica simbolica puncto promoziun da lingua. Ins sto esser pront da dar a la pressa rumantscha ina perspectiva sin almain diesch onns.

Cler e net – ils cussegliers a Berna vulan s'engaschar

DA CLAUDIA CADRUVI / ANR

■ **Pronts e semtgads per s'engaschar per la pressa – gliez èn tuts quatter Rumantschs che politiseschan en questa legislatura a Berna. Mintgin d'els ha atgnas preferentschas ed in zichel auters bassegns da leger gasetta. Ma ina chausa è clera: Els vulan batter per la pressa rumantscha en il parlament federal.**

Martin Candinas (pcd GR)

Martin Candinas (pcd) ha gia fatg in'interpellaziun a favur da la pressa rumantscha ed el è danovamain pront d'intervegnir: «L'emprim ston ins dentant avair ina strategia e suenter èsi da batter. Il bal è da preschent tar la Lia Rumantscha. Lezza sto l'emprim savair co ch'ella vul proceder. Per mai èsi impurtant che nus avain vinavant ina pressa scritta. Cun RTR avain nus ina buna purschida da radio, televisiun e novitads online. Da l'autra vart èsi impurtant che nus avain vinavant gasettas. Jau sun fermamain persvadi che nus stuain far tut per mantegnair La Quotidiana. En l'Engiadina è La Quotidiana main ferma, là datti in'alternativa cun la «Posta Ladina». Ma er ils Rumantschs a Cuira ed ordaifer il territori da tschep giavischon infurmaziuns da tuttas regiuns e gist gliez porscha La Quotidiana. Fin uss n'ha anc nagin mussà en ina furma credibla ch'i dat alternativitas tar La Quotidiana. I vegn discurre d'ina nova gasetta che cumpara duas fin

trais giadas l'emna. Ma ina nova gasetta na vegn betg pli favuravla che La Quotidiana che vegn edida cun las sinergias da Samedia. Quai vul dir: Ins avess lura mo pli trais giadas l'emna infurmaziuns scrites per il medem pretsch. Fin uss n'ha nagin preschentà autras pussaivladads concretas per ina gasetta stampada cun specifitgar il pretsch. La Lia Rumantscha duai procurar en collavuraziun cun l'editur Samedia per ina cuntinuaziun da La Quotidiana. Ils custs n'èn betg

uschè auts. Ins discurre da radund 200 000 francs che ston vegnir covrirds dal chantun, da la confederaziun e da la Lia Rumantscha. Sche quai n'è betg pli pussaivel per la Rumantschia, lura essan nus paupramain vidlonder.»

Silva Semadeni (ps GR)

Sin la dumonda sch'ella saja pronta da s'engaschar en il parlament per ina gasetta rumantscha, di **Silva Semadeni** (ps): «Absolut, quai è per mai fundamental.

Be ina gasetta online na basta betg, i dovra ina gasetta stampada. Quai ma para fitg impurtant per mantegnair il rumantsch, per empermetter rumantsch e per dar preschientscha al rumantsch. I dovra ina gasetta surregionala, pertge i dat Rumantschs en l'entir chantun ed er en il rest da la Svizra. La gasetta observa tge che capita en l'entir chantun ed er in pau en la Svizra. I po esser ina gasetta emnila che reconstruescha tge che capita durant l'emna, ina gasetta che metta ac-

cents, che fa plaschair da leger e ch'ins ha gust dad abunar. Jau na ma sent però betg uschè represchentativa per ils Rumantschs. Igl è impurtant ch'ils Rumantschs dian sezsch'els èn pronts dad abunar ina gasetta che cumpara duas, trais u be ina giada l'emna. Mes giavisch è ch'ella cumparia almain ina giada.»

Duri Campell (pbd GR)

Sin la dumonda tge giavisch ch'el haja per la pressa rumantscha di **Duri Campell** (pbd): «Per mai è impurtant ch'i dat gasettas en la regiun. Ellas na ston betg cumparair mintga di. La «Posta Ladina» vegn trais giadas l'emna, quai è fitg bun. L'auter giavisch fiss ch'i cumparian mintga di novitads, dentant be online. Sch'i reussescha da finanziar fissi bel d'avair ina gasetta digitala. Per mai bastass quai. Jau hai adina cun mai il computerin e lura hai jau online tuttas gasettas e las poss leger per exempel sin viadi en il tren. Pertge a Landquart na pon ins betg cumprair la gasetta rumantscha ed a Cinoos-chel nun hai in kiosc.» Sin la dumonda sch'el saja pront da s'engaschar en il parlament per la pressa rumantscha di Campell: «Cler e net schi! Sche nus n'avain betg pli las infurmaziuns dal di en rumantsch, lura daventa quai grev da mantegnair nosa lingua. Impurtant è ch'i dettia ina soluziun che porta mintga di novitads, cunzunt novitads fundadas, na be infurmaziuns curtas online, mabain retscherctgas a fund.»



Martin Candinas.

FOTOS MAD



Silva Semadeni.



Duri Campell.